

21 JUL 2003

PC-MEMEJA/I

GERAK MOBILE LANCAR PC MEMEJA TERKECIL DAN PALING RINGAN DI DUNIA

PUTRAJAYA, 21 Julai (Bernama) -- Gerak Mobile Technology Sdn Bhd (GMT) hari ini melancarkan komputer peribadi memeja (tablet PC) yang paling kecil dan ringan di dunia, bernama "GMT-ACE".

Ia menjangka dapat menjual sebanyak 15,000 hingga 25,000 unit dalam tahun pertama selepas pelancarannya.

"Kami berhasrat untuk menjadi entiti dunia dalam tempoh tiga tahun akan datang dan kami tidak boleh bergantung hanya kepada satu produk," kata ketua pegawai eksekutifnya, Azhar Harun.

Dengan demikian, GMT, yang telah melabur sejumlah RM6 juta bagi memajukan GMT-ACE termasuk membeli hak, menjangka untuk memperkenalkan produk baru setiap enam hingga sembilan bulan dan akan menjalankan penyelidikan dan pembangunan selanjutnya.

GMT-ACE telah dirasmikan pelancarannya di sini oleh Menteri Kewangan Kedua, Datuk Dr Jamaludin Jarjis, yang mewakili Perdana Menteri, Datuk Seri Dr Mahathir Mohamad, dan menyaksikan upacara pemeteraian tiga perjanjian dan satu memorandum persefahaman (MOU).

GMT, yang 40 peratus kepentingannya dimiliki oleh Azam Ideal Sdn Bhd, 40 peratus oleh MaxMobile Technology Pte Ltd dan 20 peratus oleh BSNC Corporation Bhd, telah menandatangani MOU dengan TIME DotCom Sdn Bhd bagi mempermudah projek perintis e-pembelajaran Malaysia.

Ia telah menandatangani perjanjian kontrak bagi projek perintis pengkomputeran memeja sekolah bestari dengan Perbadanan Pembangunan Multimedia (MDC), perjanjian bagi cawangan pemasaran global dengan Azam Ideal dan MaxMobile serta perjanjian pengedar utama dengan Azam Ideal, BSNC, Pentas Permata Sdn Bhd, Malaysian Optronics Systems Sdn Bhd dan Catch Phrase Systems Sdn Bhd.

GMT, yang diberikan taraf MSC pada Mac 2003, kini sedang memajukan sambungan wayarles mampu milik dan telah memulakan kerja bagi menghasilkan model generasi keduanya.

GMT telah ditubuhkan pada Julai 2002 dan modal saham berbayarnya akan meningkat kepada RM12 juta pada September 2003, kata Azhar. -- BERNAMA

SHO TJK KY AA